



# **PERBINCANGAN RAKYAT DEMI MELAYU**

**SIRI 16/2021**

**TAJUK:  
KEROSAKAN AQIDAH DAN PERPADUAN UMMAH:  
APA PUNCANYA?**

**Panel:**

**USTAZ ABD RAHMAN TAJUDIN**

**USTAZ DR ABDULLAAH JALIL**

**USTAZ DR ZAMIHAN MAT ZIN**

**Ditranskrip Oleh:**

**NUR NATASHA BINTI NASRUN**

**Disunting Oleh:**

**NUR NATASHA BINTI NASRUN**

**Terbitan:**  
**GABUNGAN DEMI MALAIU**

**Kerosakan Aqidah dan Perpaduan Ummah: Apa Puncanya?**

Durasi: 1:52:53

**Lokman Hakiem Abd Samad (moderator) = (0:44 - 2:08)**

Bismillahirrahmanirrahim, Assalamualaikum w.b.t dan salam sejahtera. Alhamdulillah, pada malam ini kita dapat bertemu lagi dalam Perbincangan Rakyat Demi Melayu dan kita cuba mengambil initipati daripada topik perbincangan pada minggu lepas. Kita akan cuba perkembangkan pada minggu ini dengan tajuk Kerosakan Aqidah dan Perpaduan Ummah: Apakah Puncanya? Kita tahu bahawa kerosakan aqidah dan perpaduan ummah ini merupakan satu kombinasi yang sangat baik tetapi apakah punca yang menyebabkan masyarakat kita ini mempunyai sesuatu yang kurang untuk kita angkat dan martabatkan semula. Jadi, pada malam ini Perbincangan Ralyat Demi Melayu ingin memperkenalkan barisan panel yang akan bersama-sama kita bagi mengupas topik ini. Yang pertama, kita ada Ustaz Abd Rahman Tajudin yang merupakan Felo Counter Narrative Centre for Countering Violent Extremism Islamic Strategic & Studies Institute (ISSI). Kita juga ada Ustaz Dr Abdullaah Jalil, Pensyarah Kanan Fakulti Ekonomi dan Muamalat Universiti Sains Islam Malaysia (USIM) dan Ustaz Dr Zamihan Mat Zin yang merupakan Presiden Pertubuhan Ahli Sunnah Wal Jamaah (ASWAJA). Kami mengucapkan selamat datang dan Assalamualaikum.

**Ustaz Abd Rahman Tajudin, Ustaz Dr Abdullaah Jalil, Ustaz Dr Zamihan Mat Zin (ahli panel) = (2:09-2:10)**

Waalaikumussalam w.b.t.

**Lokman Hakiem Abd Samad (moderator) = (2:11 - 2:58)**

Bagi membicarakan topik pada malam ini iaitu Kerosakan Aqidah dan Perpaduan Ummah: Apa Puncanya?, sebagai pembuka kata dan pembuka bicara perbincangan rakyat ini, kita hendak mempersilakan Ustaz Abd Rahman untuk memulakannya. Manhaj agama bagi orang Melayu ialah Ahli Sunnah Wal Jamaah. Kita lihat pada hari ini banyak masalah perpaduan kecelaruan aqidah dalam kalangan masyarakat.

***Soalan: Jadi, apakah sebenarnya jenis-jenis fahaman dan aqidah yang telah menyusup masuk ke dalam masyarakat Melayu selepas merdeka dan bagaimana kita sebagai orang biasa hendak mengenalpasti ciri-cirinya? Silakan Ustaz.***

**Ustaz Abd Rahman Tajudin (ahli panel) = (3:00 – 19:15)**

Bsimillahirrahmanirrahim (Bacaan doa). Pertama sekali, kita mengucapkan kesyukuran kita kepada Allah SWT. Yang saya kasih, tuan pengurus majlis, Encik Lokman Hakiem bin Abd Samad. Alhamdulillah, soalan yang diberikan kepada saya berkenaan apa fahaman yang muncul di Malaysia sejak kemerdekaan? Jika kita teliti, memang terdapat pelbagai fahaman yang muncul sebenarnya kerana kita mengambil sabda Rasulullah SAW, kita berdiri di atas sunnah Rasulullah SAW yang pernah bersabda yang bermaksud, “Dan akan berpecah umatku, menjadi 73 golongan kumpulan. Semuanya akan dimasukkan ke dalam neraka kecuali satu sahaja iaitu yang mengikuti aku dan para sahabat Rasulullah SAW.” Jadi, pada hadis ini kita mengerti bahawa Ahli Sunnah Wal Jamaah hanya mengikuti Rasulullah SAW dan para sahabat. Kerana itu fahaman Ahli Sunnah Wal Jamaah diperkuuhkan sehingga banyak enakmen-enakmen kerajaan negeri telah mengeluarkan fatwa yang dilaksanakan agar agama dan peribadatan itu berdasarkan kepada Ahli Sunnah Wal Jamaah yang beraqidah asya’irah bermazhab sama ada fiqh Imam Hanafi, Maliki, Shafie dan Hanbali. Kita di nusantara ini bermazhab Shafie dan bertasawuf dengan landasan syariah seperti yang disusun oleh Imam al-Ghazali. Jika menolak salah satu daripada ajaran ini, seperti menolak tasawuf maka ia terkeluar daripada Ahli Sunnah Wal Jamaah. Jadi, jika kita renungkan kembali dari aspek pensejarahan, kita akan melihat beberapa fahaman yang muncul kerana Rasulullah SAW telah menyebutkan bahawa memang benar ada 73 golongan yang mana golongan-golongan ini ada namanya tersendiri. Kita tidak boleh benci kepada penamaan-penamaan itu ataupun *labelling*. *Labelling* itu sangat penting untuk mengenal

fahaman dan ajaran sesat dan menjauhkan manusia daripada fahaman-fahaman yang songsang serta menyelamatkan manusia daripada aqidah yang merosakkan sepetimana ubat-ubat yang ada label tertentu. Jika tiada label, habislah semua dimakan dan rosaklah semua sebagaimana rosaknya aqidah. Jadi, apa fahaman yang muncul di Malaysia? Saya dapat simpulkan bahawa terdapat 4 fahaman yang muncul sejak kemerdekaan sehingga kini. Saya klasifikasikan kepada syiah, wahabi, liberal, dan ajaran-ajaran sesat yang lain. Jadi, terdapat 4 aqidah yang tidak selari dengan ajaran Ahli Sunnah Wal Jamaah. Apakah ciri-ciri mereka ini? Salah satunya ialah menolak ilmu tasawuf sedangkan ada di dalam hadis Jibril dan rukun agama. Menolak tasawuf sebenarnya menolak unsur agama sedangkan ilmu tasawuf adalah unsur yang terpenting. Jika kita lihat daripada 4 fahaman ini, yang pertama syiah yang memang ada di beberapa tempat di Malaysia yang telah pun dibanteras walaupun masih ada serpihan-serpihannya. Ciri-ciri utama syiah ialah mempunyai hukum imamah. Mereka menambah Rukun Iman yang ada enam itu iaitu ditambah kepada Rukun Imamiyyah iaitu mempercayai bahawa terdapat 12 imam-imam yang maksum. Itu merupakan ciri-ciri yang utama. Yang kedua, mereka menyelewengkan al-Quran kerana pada pandangan mereka, Saiyyidina Uthman telah menyeleweng al-Quran kerana mereka membenci sahabat. Ciri-ciri mereka juga adalah membenci para sahabat sehingga kepada Abu Bakar as-Siddiq, Umar bin al-Khattab dan Uthman bin Affan dan Aisyah Abu Bakar juga dikafirkan oleh mereka. Mereka juga mengatakan bahawa al-Quran yang sekarang ini telah berubah dan mengatakan bahawa Allah bersifat bida'. Maksud bida' ialah Allah menciptakan makhluk. Setelah mencipta makhlum, baru Allah mengetahuinya. Jadi, jika kita belajar sifat 20 yang telah disusun oleh ulama' al-asya'irah dan al-maturidiyyah, aqidah kita dalam mengenal Allah akan selamat kerana kita beriman dengan Allah itu yang bersifat Alimun iaitu Maha Mengetahui. Sebelum terciptanya alam ini, Allah telah mengetahui segala-galanya. Allah telah mengetahui siapa yang akan masuk ke neraka dan siapa yang akan masuk ke dalam syurga, Allah telah mengetahui apa yang akan kita lakukan esok. Semuanya berada dalam ilmu Allah. Jadi, pada pandangan syiah sehingga aqidah mereka rosak ialah menganggap Allah bersifat bida'. Kemudian, mereka juga mengatakan bahawa imam itu mampu hidup kembali sedangkan kita tahu bahawa roh-roh yang telah pergi tidak boleh kembali walaupun kita boleh memohon kepada Allah SWT untuk roh. Mereka juga mengatakan bahawa hujan yang turun merupakan tangisan

Ali. Perkara ini sangat teruk dan melampau dan wujud di negara kita. Fahaman yang kedua ialah fahaman Wahabi. Dari sudut aqidah, fahaman Wahabi ini adalah fahaman yang Musyabbihah dan Mujassimah, menjisimkan Allah kerana mereka menerima bulat-bulat ayat Mutasyabihat tanpa takwilan dan tafsiran. Bagi saya, Wahabi ini memang satu fahaman yang keliru dengan salaf. Tanpa disedari, mereka itu adalah sahidus salafi. Mereka menerima salaf tetapi bermanhaj Mujassimah sedangkan ulama' salaf mentafsir dan menyerahkan seratus peratus kepada Allah SWT dan ayat-ayat Mutasyabihat tetapi golongan Wahabi telah menetapkan sehingga jatuh ke lembah menjisimkan Allah iaitu Allah mempunyai tangan, Allah turun pada sepertiga malam lalu turun memakbulkan doa. Jadi, fahaman menjisimkan ini adalah aqidah yang rosak. Kerana itulah jika ada penceramah yang berceramah di surau-surau, masjid-masjid, kuliyyah Maghrib mengatakan Allah ada tangan, wajah dan sebagainya, maka dia telah jatuh kepada lembah Mujassimah iaitu menjisimkan Allah SWT. Ini merupakan golongan Wahabi yang keliru dengan salaf sebenarnya kerana salaf itu penyerahan tafsiran ayat Mutasyabihat kepada Allah SWT tanpa penentuan. Tetapi fahaman Wahabi dari sudut syariah, mereka membidaahkan perkara-perkara yang sunat. Perkara-perkara ikhtilaf dikatakan sebagai bidaah. Ini boleh menimbulkan pergaduhan dan perpecahan antara umat di Malaysia ini. Sepertimana kita membaca Yassin pada malam Jumaat, mereka mengatakannya bidaah. Begitu juga dengan tahlil, mereka menganggapnya bidaah sedangkan tahlil itu membaca al-Quran untuk menyampaikan pahalanya kepada roh kerana menurut Ahli Sunnah Wal Jamaah, pahala itu sampai. Jadi jika kita lihat dalam sejarah, Wahabi ini telah menjatuhkan empayar Khilafah Uthmaniyyah. Mereka telah bersepakat dan mengumpulkan kekuatan untuk menjatuhkan empayar Uthmaniyyah di Arab Saudi. Salah satu faktor yang terbesar ialah apabila Muhammad bin Abdul Wahab telah menubuhkan Wahabi dan menghidupkan semula ajaran Ibnu Taimiyah yang telah dimatikan oleh Mazhab pada masa itu. Fahaman Wahabi juga beriman dengan tauhid rububiyyah, uluhiyah dan asma wa sifat. Dari aspek rububiyyah, mereka memasukkan orang kafir kepada Islam. Kemudian sudut Uluhiyyah, mengeluarkan orang Islam itu daripada agama iaitu mengkafirkan orang Islam contohnya orang yang sedang bertawassul, beristighhasah dikatakan sebagai syirik sedangkan itu bukan syirik kerana wujud ayat al-Quran dan hadis yang menyatakan bolehnya bertawassul. Bagi asma wa sifat, mereka mentafsir ayat Allah yang

berkenaan dengan tangan, mata, hidung, MasyaAllah. Maha Suci Allah. Secara gambaran jelas, mereka inilah yang membuat kerosakan seperti di Syria akhirnya hancur lebur kerana pemberontak berfahaman wahabi sebelum berlaku pergolakan dan perperangan di sana, buku-buku Muhammad bin Abdul Wahab disebarkan. Memang terbukti bahawa mereka ini yang membuat kucar-kacir di negara-negara Islam. Wahabi dan syiah lah yang menyebabkan pergaduhan sehingga hancur tamadun. Yang ketiga, saya simpulkan di Malaysia muncul fahaman liberal. Fahaman ini mahukan hak individu dikukuhkan. Agama tidak perlu campur tangan sehingga tertubuhnya LGBT dan sebagainya. Liberal ini menggunakan aqliah semata-mata. Mereka terlalu menganggungkan akal sehingga boleh menyeru kepada kebebasan berfikir. Apa yang logik perlu diterima sedangkan banyak perkara hak yang tidak boleh diterima secara logik kerana akal ini ada batasannya. Mereka juga memperjuangkan hak asasi manusia tanpa perlu melalui proses perundangan. Mereka mengatakan al-Quran tidak sesuai pada zaman ini dan perlu ditafsirkan semula. Ini pandangan mereka iaitu Islam liberal. Mereka juga mengatakan bahawa nabi itu diutuskan hanya kepada bangsa Arab semata-mata dan bukan kepada semua bangsa manusia. Jadi, mereka mentafsir al-Quran dan hadis berdasarkan akal semata-mata sehingga mereka memperjuangkan hak individu untuk dibolehkan murtad kerana itu merupakan hak individu sehingga menganggap agama itu sebagai budaya dan sehingga boleh menjadi kepada fahaman sekularisme dan melawan syariat. Aurat boleh dibuka, lelaki dan perempuan itu sama, dan sebagainya. Aqidah liberal akan menuju kepada fahaman pluralisme agama. Pluralisme agama adalah mengaggap bahawa semua agama adalah benar dan masuk syurga. Ini merupakan fahaman baru pada masa sekarang. Salah satunya ialah Milah Abraham. Ini merupakan satu fahaman yang meliberalkan Islam. Wahyu itu dikatakan ditulis oleh orang-orang Arab sahaja. Zaman sekarang memang wujud nama-nama yang memperjuangkan liberal ini sehingga ilmu Islam seperti tauhid, fiqh, tasawuf dikatakan ilmu buatan manusia dan bukan daripada wahyu Allah SWT sedangkan kita ketahui bahawa 3 elemen penting ini iaitu tauhid, fiqh, syariat dan tasawuf, atau akhlak daripada hadis Jibril itu. Jadi, dari sudut Islam liberal, hukum itu boleh berubah-ubah. Fahaman ini memang wujud di Malaysia seperti sabda Nabi SAW. Yang keempat ialah ajaran-ajaran sesat. Antara ajaran sesat adalah seperti PMYT, tetapi tidak seteruk wahabi kerana mereka sudah masuk kepada aqidah. Begitu juga dengan ajaran al-Arqam, sehingga

mengaku nabi, sedangkan aqidah Ahli Sunnah Wal Jamaah mengatakan bahawa nabi yang terakhir ialah Nabi Muhammad SAW. Jadi, inilah fahaman-fahaman yang muncul sejak merdeka. Kita kenal syiah, wahabi, liberal, ajaran-ajaran sesat di Malaysia ini. Sebenarnya mereka ini telah merosakkan aqidah. Saya harap kerajaan ulil amri ini memerhatikan fahaman-fahaman ini kerana Rasulullah SAW telah mengatakan bahawa fahaman ini akan muncul. Saya simpulkan bahawa 4 fahaman ini ada di Malaysia. Dalam sejarah pun kita boleh lihat pertembungan antara kelompok golongan kaum muda dan kaum tua, maka lahirlah fahaman-fahaman wahabi yang melawan tradisi Islam itu. Jadi, ia perlu dihalang kerana boleh mencapai radikalisme dan ekstremisme dan boleh merosakkan perpaduan ummah kita di Malaysia ini. Program ini adalah satu program diskusi yang sangat baik, Demi Melayu, kerana kita ini bangsa Melayu, bangsa yang bermanhajkan Ahli Sunnah Wal Jamaah. Itu sahaja, saya serahkan kepada tuan moderator.

**Lokman Hakiem Abd Samad (moderator) = (19:15 – 19:58)**

Terima kasih diucapkan kepada Ustaz Abd Rahman atas ulasan tadi. Ustaz telah menyebut bahawa umat Islam akan berpecah kepada 73 golongan dan di Malaysia terdapat 4 golongan yang dikenalpasti seperti syiah, wahabi, liberal, ajaran sesat dan sangat membimbangkan.

*Soalan: Jadi, bagi menyambung kuperasan ini, kita hendak menjemput Ustaz Dr Zamihan Mat Zin untuk bercakap tentang apakah kesan perbezaan fahaman agama ini kepada masyarakat daripada sudut perpaduan dan apa kaitannya dengan kerosakan aqidah dan moral dan masyarakat? Hal ini kerana kita dapat katakan bahawa rupa kelihatan sama-sama Melayu, tetapi fahaman Islam itu berbeza dan menjerumus kepada satu perkara yang membimbangkan. Silakan Ustaz.*

**Ustaz Dr Zamihan Mat Zin (ahli panel) = (20:06 – 32:43)**

Bismillah (Bacaan doa). Terima kasih kepada saudara moderator. Yang saya kasihi, sahabat ahli panel, al-Fadhil Ustaz Abd Rahman Tajudin, dan al-Fadhil Dr Ustaz Abdullaah Jalil dari USIM,

penganjur yang saya hormati, Sheikh Abdul Kareem bin Said Khadaied dan semua urusetia yang terlibat bagi menjayakan bicara ilmu kita pada malam ini. Terlebih dahulu saya mengucapkan terima kasih kerana sudi menjemput saya bagi memberi sepatah dua kata berkaitan topik kerosakan aqidah dan cara menanganinya dengan semangat perpaduan Islam yang tulen. Tuan-tuan, sidang penganjur, para urusetia, para panel dan pendengar yang dirahmati Allah, apabila kita membicarakan tentang kesan kemunculan aqidah atau ajaran sesat dalam kalangan masyarakat, tentunya memberi kesan yang amat besar kepada aqidah, perpaduan ummah, dan munculnya ancaman terhadap keselamatan negara. Jadi, perkara ini bukan bicara santai semata-mata tetapi memerlukan tindakan jangka pendek dan panjang bagi menangani konflik yang sedang berlaku dan akan berlaku. Kesan yang pertama jika kita gagal membendung perkara ini ialah menyebabkan umat Islam berbalah, berpecah, saling menyalahkan, bidaah membidaah, syirik mensyirikkan, dan kafir mengkafirkhan antara satu sama lain. Justeru agensi agama yang merujuk kepada majlis agama selaku peletak dasar hal ehwal agama Islam di Malaysia. Begitu juga dengan jabatan mufti selaku badan yang bertanggungjawab untuk mengeluarkan fatwa atau garis panduan bagi sesuatu penyelewengan yang berlaku dan jabatan agama sebagai agensi yang bertindak untuk mengekang sebarang unsur penyelewengan yang berlaku. Jadi, agensi agama ini sama ada dalam peringkat persekutuan atau peringkat negeri perlu sentiasa peka dengan fenomena ajaran sesat atau penyelewengan agama kerana dalam surah al-Fatihah, induk al-Quran, kita selalu menyebut “Ihdina as-siratul mustaqim.” Inilah nilai sebenar Islam, iman atau ihsan seseorang itu terletak pada aqidah yang sahih, aqidah Ahli Sunnah Wal Jamaah, aqidah yang dibawa oleh Nabi SAW dan para sahabat, para tabiin, para aulia’ daripada mula ia diwahyukan sehingga hari kiamat. Jadi, agensi agama di peringkat persekutuan atau negeri perlu peka kepada isu penyelewengan aqidah ini kerana ia merupakan dasar tentang perjalanan hidup umat Islam. Justeru kita mahukan fahaman yang benar, amalan yang benar yang berinspirasikan kepada aqidah yang sahih. Aqidah yang sahih hanya terdapat satu dalam Islam, dalam aqidah Ahli Sunnah Wal Jamaah iaitu sebagaimana yang dirintis oleh jumhur ulama’ Ahli Sunnah Wal Jamaah yang dipelopori oleh ulama’ asya’irah dan maturidiyyah. Apabila disebut istilah teknikal yang dimaksudkan dengan Ahli Sunnah Wal Jamaah, itulah kelompok umat Islam yang dipimpin oleh ulama’ asya’irah dan maturidiyyah yang turut merangkumi mazhab fiqh yang mu’tabar, dan

pegangan sufi yang benar, Alhamdulillah. Jadi, apabila kita membaca kepentingan ini, Allah SWT mengingatkan kita tentang kepentingan berpegang dengan aqidah Ahli Sunnah Wal Jamaah. Apabila kita solat dan membaca tahiyyat pertama, sunat dan tahiyyat akhir yang wajib, dalam kedua-dua tahiyyat ini disebut manifestasi aqidah Ahli Sunnah Wal Jamaah, dalam kalimah syahadah, itu bermaksud betapa pentingnya aqidah Ahli Sunnah Wal Jamaah. Begitu juga dalam azan, iqamat, dan menyambut permulaan mentahnik anak, azan telinga kanan, iqamat telinga kiri semasa kelahiran bayi dan talqinkan mayat seorang Muslim yang telah meninggal dunia, maka kita talqinkan dengan La Ilaha Ilallah. Nabi SAW menyebut bahawa mana-mana manusia yang menyebut La Ilaha Ilallah sebagai perkataan terakhir semasa hidupnya, nescaya dia akan masuk ke dalam syurga. Inilah dalil-dalil yang menjelaskan tentang kepentingan untuk kita berpegang dengan aqidah Ahli Sunah Wal Jamaah. Memang duit, ekonomi, urusan saham, dollar Amerika, KDNK, keselamatan negara dan sebagainya penting. Tetapi apa gunanya harta, benda, takhta, rupa, wanita, kekayaan dan popular jika kita berpegang dengan aqidah yang batil. Justeru agensi agama sama ada di peringkat persekutuan atau negeri, atau NGO-NGO, keluarga atau individu hendaklah peka tentang kepentingan sebenar kita dicipta sebagai manusia iaitu untuk beriman kepada Allah SWT sebagaimana yang terangkum dalam hadis sahih, yang diriwayatkan oleh Imam Bukhari Rahimahullah, jelas mengisyaratkan kepada kita bahawa perkara yang paling penting dalam hidup kita ialah berpegang teguh kepada aqidah Ahli Sunnah Wal Jamaah, dan satu-satunya manhaj yang benar ialah yang dipelopori oleh ulama' iaitu asya'irah dan maturidiyyah. Jadi, jika kita tidak menjaga aqidah, timbulnya ajaran, fahaman, amalan yang sesat atau bercanggah dengan Ahli Sunnah Wal Jamaah, maka akan menyebabkan perbalahan, persengketaan, pertembungan pemikiran, sesat-menyesat dan sebagainya berlaku. Bayangkan di negara kita, kita katakan agama Islam sebagai agama persekutuan, Islam yang jenis mana satu? Seperti Ustaz Abd Rahman katakan tadi, terdapat Islam jenis syiah, liberal, wahabi dan ajaran-ajaran sesat yang lain. Jadi, Perkara 3.1 dalam Perlembagaan perlu dipinda dan diubah oleh pemimpin-pemimpin Melayu, Sultan Melayu, Raja Melayu, Ketua Agama dan Adat-Istiadat Melayu, yang perlu sedar akan kepentingan ini dan mengubahnya kepada Islam agama persekutuan mengikut Ahli Sunnah Wal Jamaah. Dalam Undang-Undang Tubuh Negeri, sesetengah negeri telah memperincikan Ahli Sunnah Wal Jamaah yang dimaksudkan ialah

mengikuti metodologi asya'irah maturidiyyah, mazhab mu'tabar terutamanya mazhab Shafie dan mengikut panduan atau pedoman sufi yang benar. Apabila kita ada Perlembagaan, maknanya kita ada dasar perundangan yang teguh. Apabila kita ada Perlembagaan, ini bermakna kita mempunyai dasar perundangan yang teguh. Ia akan saling menguatkan dengan Undang Undang Tubuh Negeri, Enakmen Pentadbiran Islam di Negeri-Negeri

di bawah kuasa Tuanku sebagai ketua agama dan adat istiadat negeri. Jadi, dasar undang-undang ini membolehkan agensi agama bertindak untuk menjaga kepentingan umat Islam terutamanya memperkasa atau memelihara aqidah Ahli Sunnah Wal Jamaah supaya tidak dicemari oleh ajaran sesat atau pemikiran yang menyeleweng. Yang kedua, apabila kita tidak menjaga aqidah Ahli Sunnah Wal Jamaah, akan menyebabkan munculnya golongan radikal atau ekstremis atau militanis dalam agama Islam. Apabila agama gagal difahami dengan baik dari sudut aqidah, fiqh, tasawuf atau disiplin ilmu yang lain, maka berlakulah penyelewengan agama dan muncul golongan ekstremis atau radikal. Ini akan memberi ancaman kepada keselamatan negara. Ini merupakan perkara yang perlu diambil perhatian oleh pihak berkuasa agama. Jika kita lihat Daish, ISIS, ajaran Ayah Pin, Haji Kahar, Qadiani, Baha'i, PMYT, ajaran Millah Abraham dan sebagainya. Semua ajaran sesat ini akan bergerak dalam kerangka pemikiran radikal dan apabila mereka mempunyai capaian, rangkaian, jalinan, persenjataan, kekuatan ekonomi, maka mereka akan bergerak ke peringkat ekstremis. Apabila ada senjata, rangkaian kewangan, maka mereka akan berpindah ke era militanis atau terrorist. Jadi, akan mengganggu gugat keselamatan negara. Yang ketiga, apabila ajaran sesat ini tidak dibendung dari awal, ia akan mencetuskan fitnah yang dahsyat terhadap umat Islam. Kita lihat apabila timbul isu pelampau syiah, pelampau liberal, LGBT atau pelampau wahabi takfiri, atau ajaran-ajaran sesat yang lain, orang bukan Islam akan memandang buruk kepada orang Islam kerana mereka menganggap bahawa Islam itu ganas, ekstremis dan sebagainya. Jadi, tercetus Islamophobia di Amerika atau di Barat. Mereka mengatakan bahawa Islam berperangai buruk, jahat dan sebagainya. Nama Islam akan buruk sekiranya perkara ini gagal dibendung. Jadi, kerajaan perlu pruhutun dengan perkara ini. Apabila terdapat unsur penyelewengan dan penyebaran ajaran sesat, maka kerajaan melalui agensi agama perlu bertindak dengan pantas dan tuntas, insyaAllah. Itu sahaja.

**Lokman Hakiem Abd Samad (moderator) = (32:44 – 33:51)**

Baik, terima kasih diucapkan kepada Ustaz Dr Zamihan Mat Zin atas penjelasan tersebut. Ustaz menyebut bahawa agensi agama perlu mempunyai aqidah yang sahih. Tetapi jika kita lihat pada hari ini, jika tiada angin, masakan pokok bergoyang kerana dalam agensi kerajaan yang sepatutnya menegakkan ajaran Ahli Sunnah Wal Jamaah sebagai panduan umat Islam di Malaysia ini khususnya orang Melayu, elemen-elemen yang disebutkan oleh Ustaz Abd Rahman tadi sudah ada yang telah menyusup masuk ke dalam agensi-agensi ini. Secara tidak langsung, telah menimbulkan kerosakan halus. Bagi soalan yang seterusnya, kita hendak tanyakan kepada Ustaz Dr Abdullaah Jalil.

*Soalan: Apakah peranan agensi agama Islam dan institusi pelajaran dalam mengekalkan keharmonian dan kemurnian manhaj Ahli Sunnah Wal Jamaah agar perpaduan masyarakat tidak berpecah? Adakah agensi-agensi agama Islam sejak zaman merdeka sehingga kini telah menjalankan peranan dengan sangat baik dalam menegakkan ajaran Ahli Sunnah Wal Jamaah di Tanah Melayu ini? Silakan.*

**Ustaz Dr Abdullaah Jalil (ahli panel) = (33:52 – 47:12)**

Baik, terima kasih saudara pengurus majlis, Encik Lokman Hakiem. Yang saya hormati, sahabat panel, Dr Zamihan al Ghari serta Ustaz Abd Rahman Tajudin dan pihak pengajur bagi forum yang sangat penting dan perlu diambil berat dan diadakan berterusan secara berkala, insyaAllah. Baik, apakah peranan institusi agama dan pelajaran bagi mengekalkan perpaduan masyarakat? Kita telah melihat bahawa Ustaz Abd Rahman telah menjelaskan 4 jenis fahaman sesat di Malaysia dan Ustaz Zamihan telah menghuraikan tentang kesan-kesannya. Jadi, antara kesan penyebaran ajaran bidaah atau penyelewengan ajaran Ahli Sunnah Wal Jamaah ini adalah perpecahan, pertelingkahan, pergaduhan, pertumpahan darah, imej Islam makin buruk dan sebagainya. Sepatutnya agama menyatukan umat, dan bukan memecahbelahkan. Jika agama itu memecahbelahkan umat, maka itu merupakan tanda yang sangat besar telah menyeleweng daripada aqidah Ahli Sunnah Wal Jamaah. Kita perlu faham bahawa penyakit aqidah ini tersebar secara perlahan-lahan. Jika ditanya adakah bermula sejak merdeka dan sebagainya? Ya, memang betul. Perkara ini diibaratkan seperti anai-anai. Jika tidak ditangani dari awal,

sedar-sedar rumah sudah hendak roboh. Jadi, sebab itu kita perlukan pemantauan dari awal. Saya ambil contoh, kita katakan apabila berlaku revolusi Iran pada tahun 1979, maka ada pihak yang terpesona walaupun hakikatnya tiada masyarakat Melayu syiah yang sistematik sebelum revolusi Iran. Yang dilaporkan hanya seorang dua sahaja. Tetapi apabila berlaku revolusi itu, maka ada yang terpesona dan menghantar anak-anak mereka belajar di kom, akhirnya golongan ini pulang lalu mewujudkan masyarakat Melayu syiah yang sistematik dan semakin berkembang sedikit demi sedikit. Begitu juga dengan pemikiran seperti wahabi yang menanam mentakfirkan, membidaahkan amalan masyarakat di Malaysia dan sebagainya. Apatah lagi golongan yang datang daripada tajaan-tajaan Barat seperti liberal, feminism dan sebagainya, mereka muka menyebarkan sedikit demi sedikit seperti anai-anai. Kita tidak nampak kesannya sekarang, tetapi sedikit demi sedikit menghancurkan. Di negara Arab, wahabi dan syiah memang saling bunuh-membunuhi malah di Pakistan pun begitu juga. Jadi, sebagai pihak berkuasa agama, kita mesti ada agenda. Agenda tersebut mestilah bersifat preventif iaitu mencegah terlebih dahulu aqidah yang rosak ini sebelum hanya memulihkan ketika hampir roboh. Sepertimana yang disebut oleh Dr Zamihan, kita perkasakan kedudukan dan tafsiran Ahli Sunnah Wal Jamaah dalam undang-undang. Mungkin pihak berkuasa agama boleh berkerjasama dengan Penasihat Undang-Undang Negeri seperti JAKIM bekerjasama dengan AG untuk mencadangkan tafsiran Ahli Sunnah Wal Jamaah dimasukkan dalam Undang-Undang Tubuh atau lebih baik lagi, dalam Perlembagaan. Terdapat juga negeri yang memasukkannya dalam Enakmen Pentadbiran Islam Negeri. Tafsiran yang menyebut asya'irah, mazhab Shafie, mazhab sufi Junaid al-Baghdad dan Imam Ghazali. Tafsiran ini perlu diperkasakan dalam undang-undang sedia ada. Kemudian, antara pendekatan lain yang boleh diambil, saya mengesyorkan juga agar jawatankuasa pemantauan aqidah di peringkat negeri seperti di Johor, menjalankan tugas dengan memberikan penerangan, membuat pemantauan, kawalan monitori proses, membuat dakwaan dan tidak membuat dakwaan tanpa tauliah semata-mata. Dakwa atas dakwaan ajaran menyeleweng agar masyarakat tahu bahawa ajaran tersebut adalah ajaran yang menyeleweng daripada manhaj Ahli Sunnah Wal Jamaah. Kemudian, perlu ada laporan, program dan latihan khususnya kepada orang-orang yang terlibat dalam pengurusan masjid dan surau, pengurusan-pengurusan pengajian agama di peringkat masjid dan surau, bahkan boleh membuat sijil Ahli Sunnah Wal Jamaah.

Sebagai contoh di Johor, ada mengeluarkan sijil untuk menjadi imam, boleh juga diadakan program pensijilan Ahli Sunnah Wal Jamaah al-asya'irah maturidiyyah, Shafieiyah, Sufiyyah. Jadi, kita profesionalkan pendekatan kita dalam memperkasakan aqidah Ahli Sunnah Wal Jamaah ini. Saya juga lihat bahawa media massa sangat penting selain daripada pendekatan undang-undang, penubuhan jawatankuasa yang akan memantau, melapor dan sebagainya. Kita juga perlu ada media massa yang kuat. Sebagai contoh, apabila tiba bulan Rabiul Awal, keluar risalah-risalah yang menjawab tentang sambutan Maulid Nabi, membuat pengajian-pengajian berkenaan kemuliaan Rasulullah. Apabila tiba bulan Rejab, menceritakan tentang kemuliaan bulan Rejab, bulan Syaaban. Jadi, apabila tibanya masa-masa sebegini, media massa seharusnya memberikan respon pantas. Maka masyarakat kini yang banyak bergantung dan menggunakan media massa boleh merujuk dengan cepat dan menghilangkan syubahat dan sebab-sebab pertelingkahan. Jika tidak, masjid dan surau bergaduh, masyarakat bergaduh, keluarga bergaduh dan sebagainya. Kita mengetahui pelbagai kisah seperti isu Talqin. Apabila pihak surau hendak menguruskan jenazah dan melakukan talqin, anak kepada jenazah pula marah dan tidak membenarkannya. Seolah-olah talqin boleh menyebabkan masuk ke dalam neraka sedangkan di sisi jumhur ulama', talqin ini sunat kerana meringankan soal jawab kubur. Itulah fadhilat talqin. Maka, media massa perlu lebih aktif. Saya juga pernah mencadangkan kepada satu majlis agama. Saya mengatakan bahawa pada zaman sekarang ini, kita boleh membuat penerbitan secara percuma tanpa kos iaitu melalui PDF. Jika satu isu hendak dijawab oleh puluhan Ustaz, kadangkala tidak didengari oleh masyarakat. Tetapi jika isu tersebut dikeluarkan atas nama jabatan mufti atau jawatankuasa fatwa negeri atau majlis agama, walaupun jawapan tersebut pendek sahaja, tetapi akan menjawab banyak kesusyikan masyarakat. Jadi, penerbitan-penerbitan yang berautoriti dan berilmiah perlu diberikan secara percuma. Jika dahulu, kita katakan bahawa *hard copy* memerlukan kos untuk *printing* dan sebagainya, tetapi sekarang kita boleh buat dalam bentuk *soft copy*. Fatwa-fatwa terkini berkaitan dengan ajaran sesat di negeri-negeri tersebut boleh dikompilasikan dalam bentuk PDF dan disebarluaskan. Menurut pengalaman saya, kita boleh lihat bahawa sebelum Negeri Sembilan mengeluarkan fatwa secara rasmi berkenaan gerakan wahabi, terdapat ramai masyarakat yang bergaduh di aplikasi WhatsApp dan sebagainya. Ada yang pro wahabi, ada yang menjawab dan membela. Maka,

apabila Negeri Sembilan mengeluarkan fatwa mengenai wahabi, kita kongsikan sahaja fatwa tersebut dalam bentuk PDF. Maka, masyarakat tidak akan bergaduh dan mempersoalkannya lagi. Jadi, saya lihat bahawa menegakkan dan menyampaikan kebenaran dalam media massa ini tidak memerlukan kos yang tinggi. Cukup sekadar menfaillkan PDF lalu menyebarkannya, maka masyarakat akan diam. Jadi, perlu disebarluaskan maklumat tentang ajaran yang menyeleweng daripada ajaran Ahli Sunnah Wal Jamaah dan diulangsebarluaskan supaya terdapat banyak terbitan semasa mengikut keperluan dan imej pada masa tersebut. Jadi, saya harap jawatankuasa pemantauan fatwa bina institusi penyelidikan Ahli Sunnah Wal Jamaah, bina jawatankuasa dan penerbitan Ahli Sunnah Wal Jamaah. Maka, insyaAllah akan memudahkan perjuangan kerana telah ada pasak yang kukuh. Jadi, kita hanya perlu menyampaikan dengan tenang dan tidak perlu berdebat dan sebagainya. InsyaAllah akan lebih mendamaikan. Itu sahaja, terima kasih.

**Lokman Hakiem Abd Samad (moderator) = (47:13 – 49:42)**

Baik, terima kasih Ustaz Dr Abdullaah Jalil atas kupasan itu. Kita hendak bacakan dahulu komen-komen penonton sebelum memasuki fasa pusingan yang kedua. Daripada Salleh Leh Salleh, “Sejak PN berkuasa, Wahabi dari Perli telah mula merebak dan mula menguasai pusat-pusat agama dan badan-badan penting dalam kerajaan.” Wallahualam. Kemudian, daripada Tok Pakir, “Mufti Kelantan mengatakan bahawa Wahabi mazhab mu’tabar.” Dan daripada Kamila Maarof, “Setuju dengan penerbitan percuma secara *soft copy* dan jawatankuasa fatwa rasmi memandangkan sekarang merupakan zaman mendapatkan maklumat hanya melalui internet dan media massa sahaja.” Daripada Faudzee Abd Hamid pula, “Ajaran Wahabi ini ibarat ikan, jika tidak dimakan dengan cepat, maka ia akan busuk. Jadi, perlu selesaikan isu yang bercelaru dan memecahbelahkan umat.” Daripada Muhammad Syakir, katanya, “Alhamdulillah, terbaik cadangan dan ulasan bagi memeperkasakan aqidah Ahli Sunnah Wal Jamaah. Mantapkan *grassroot* bagi membendung perkara ini.” Terdapat satu soalan juga, “Mengapa golongan agamawan sendiri terperangkap dalam ajaran Wahabi? Di mana silapnya?” Dan daripada Al Filfilan, “Sekat pelajar ke pusat pengajian Islam yang tidak selari dengan ASWAJA sama ada dalam atau luar negara, sangat mengharapkan ketegasan daripada yang berautoriti sama ada ulama’ atau umara’. Bagi pusingan yang kedua, kita hendak bertanya kepada Ustaz Abd Rahman. Pada pandangan Ustaz, mengapa tidak begitu ramai golongan Ahli Sunnah Wal Jamaah

aktif atau lantang di media massa. Jika kita lihat, masyarakat lebih nampak golongan yang minoriti seperti syiah, wahabi yang tidak selari dengan aliran Ahli Sunnah Wal Jamaah. Tetapi apabila ditanya siapakah tokoh-tokoh Ahli Sunnah Wal Jamaah yang sepatutnya menjadi rujukan, masyarakat tidak nampak figura ini.

***Soalan: Jadi, pada pandangan Ustaz, bagaimana kita hendak menyelesaikan dan membantu masyarakat untuk mengenal pasti tokoh Ahli Sunnah Wal Jamaah yang sepatutnya diikuti berlandaskan cara yang sebenar? Silakan Ustaz.***

**Ustaz Abd Rahman Tajudin (ahli panel) = (49:42 – 58:13)**

Alhamdulillah, terima kasih kepada moderator, saudara Lokman Hakiem. Sebelum saya menjawab, saya bersetuju dengan Dr Zamihan supaya tidak membiarkan radikalisme itu. Saya juga bersetuju dengan Dr Abdullaah Jalil penguatkuasa agama ini perlu melakukan preventif iaitu menghalang daripada berlakunya radikalisme agama ini kerana fahaman-fahaman ini boleh membawa kepada kehancuran umat. Kemudian, mengapa Ahli Sunnah Wal Jamaah ini tidak bersuara? Saya rasa salah satu faktor mungkin tawaduk kerana ulama'ulama' Ahli Sunnah Wal Jamaah ini perlu mendalami agama lagi berlainan dengan wahabi yang baru mengetahui satu dalil sahaja telah keluar di media massa, semua bidaah. Satu dalil ini boleh menghancurkan banyak perbuatan sunat kita. Kullu bidaah ini melalui satu dalil boleh digunakan untuk pelbagai perkara. Wahabi ini tidak memahami secara mendalam tentang talaqqi musyafahah, maka tidak perlu bersanad. Maka, proses pembelajaran itu sebenarnya panjang. Jadi, mungkin faktor ini yang menyebabkan Wahabi selalu muncul di media sosial. Sabda Rasulullah SAW, akan keluar di akhir zaman golongan muda yang membaca al-Quran tidak sampai ke hati. Bagaikan anak panah yang terlepas daripada busurnya. Maksudnya, tidak sampai ke hati kerana mereka menolak ajaran tasawuf ini. Jadi, saya kira itu merupakan faktor yang utama. Faktor utama yang lain ialah berdasarkan kepada ideologi pemerintah itu. Jika ideologi seseorang pemerintah itu syiah, maka golongan ASWAJA sukar untuk bersuara. Walau bagaimanapun, kita perlu menyatakan hak dan aqidah yang benar kerana tauhid ini merupakan asas kepada ibadat kita. Maksudnya, sekiranya tauhid kita salah, maka ibadat-ibadat lain juga mungkin tidak diterima. Tauhid itu satu. Jika menganggap bahawa Allah itu duduk di atas arasy, maka rosaklah aqidah

itu. Ini masalah golongan-golongan yang keliru. Faktor yang lain bagi saya ialah golongan Wahabi ini melakukan pembunuhan karakter sebenarnya. Apabila sahaja Ahli Sunnah Wal Jamaah bersuara, maka akan cepat dijatuhkan oleh Wahabi kerana mereka kuat membuka aib sedangkan sabda Rasulullah SAW, daripada Abdullah bin Umar, “Barang sesiapa yang menutup aib seorang Muslim, Allah akan menutup aibnya pada hari kiamat.” Bagi golongan Wahabi, malah perkara yang aib itu diuar-uarkan. Subhanallah. Mereka hanya mengikuti hadis-hadis kulla bidaah tetapi hadis-hadis yang lain mereka tolak. Mereka mengaku salaf tetapi tidak mengikutinya malah mengikut ajaran-ajaran yang songsang. Mereka kuat melakukan pembunuhan karakter sehingga perjuangan Ahli Sunnah Wal Jamaah kalau boleh disekat habis-habisan. Oleh itu, pada pandangan saya, ulil amri perlu menyediakan forum yang mematahkan hujah-hujah fahaman-fahaman songsang sehingga tertegak fahaman yang benar. Melalui diskusi ilmiah seperti ini juga merupakan cara kita untuk menyampaikan ilmu itu. Jika kita lihat hadis Rasulullah SAW, diriwayatkan oleh Abu Sa’id al-Khudri, hadis riwayat Muslim, “Man ra’ā minkum munkaran falyughayyirhu bi yadihi” yang bermaksud, “Barang siapa antara kamu yang melihat kemungkaran, hendaklah mengubah dengan tangan.” Tangan yang dimaksudkan itu ialah ulil amri. Jadi, ulil amri perlu melaksanakan enakmen-enakmen negeri yang telah menfatwakan wahabi tidak sesuai di Malaysia. Penceramah wahabi memang boleh ditangkap kerana melanggar enakmen negeri sepertimana di Sabah yang telah keluar bahawa syiah, wahabi dan ajaran sesat lain tidak dibenarkan berdakwah di negeri Sabah. Kemudian, “Fa in lam yastati’ fa bi lisanihi,” maksudnya mengubah dengan lisan iaitu berdakwah seperti perbincangan kit aini. Jadi, tahniah kepada pengajur kerana menyediakan forum ini untuk bersuara. Ramai yang tidak tahu tentang ancaman aqidah ini pada akhir zaman. Kemudian, “Fa in lam yastati’ fa bi qalbihi,” yang bermaksud mengubah dengan hati. Rasulullah SAW berkata “wa dzalika ad’af al-iman.” Maka, itu adalah selemah-lemah iman. Jadi, kita lihat mengapa Ahli Sunnah Wal Jamaah tidak keluar untuk menyatakan, tetapi golongan wahabi ini, dengan dana yang mereka miliki, mereka menjatuhkan sesorang itu sehingga yang benar kelihatan tidak benar. Itulah permainan mereka. Jadi, pada pandangan saya, jawapan kepada soalan itu ialah disebabkan tawaduk dalam mempelajari talaqqi musyabahat yang perlu dituntut dalam jangka masa yang sangat panjang. Oleh itu, wahabi yang hanya mempunyai satu ilmu yang sedikit

sahaja itu sudah keluar di media social dan menyatakan sedemikian, membidaah dan menyebabkan pergaduhan ummah. Di masjid juga boleh bergaduh disebabkan Wahabi kerana apa sahaja tradisi yang dilakukan dikatakan sebagai bidaah. Ini merupakan fahaman Wahabi yang boleh merosakkan pegangan umat Islam di Malaysia ini. Ini ancaman aqidah yang boleh merosakkan umat Islam. Jadi, pembinaan tamadun perlu Kembali kepada turas Islam iaitu Ahli Sunnah Wal Jamaah. Naratif Ahli Sunnah Wal Jamaah mesti beraqidah asya'irah dan maturidiyyah bermazhab sama ada Shafie, Maliki, Hanafi, Hanbali dan di Malaysia, Shafie dan bertasawuf berlandaskan syariah yang telah dilakar oleh Iman Junaid dan Imam Ghazali sehingga kepada melahirkan tamadun umat. Jika kita lihat sejarah daripada ibnu al-Arabi melahirkan tamadun al-Uthmaniyyah, Muhammad Abdul Fateh yang mempunyai ulama' tasawuf di belakangnya sehingga boleh menawan kota Konstantinople. Begitu juga ajaran Imam Ghazali yang melahirkan Salahudin al-Ayubi yang menawan Baitul Muqaddis. Subhanallah. Kedua-duanya daripada ajaran Ahli Sunnah Wal Jamaah. Itu bermakna ajaran Ahli Sunnah Wal Jamaah membina tamadun dan melawannya sebenarnya meruntuhkan tamadun. Itu sahaja. Semoga perbincangan ini dilanjutkan pada masa akan datang.

**Lokman Hakiem Abd Samad (moderator) = (58:14 – 59:59)**

Baik, terima kasih diucapkan kepada Ustaz Abd Rahman. Kita hendak bacakan sedikit komen yang agak panas. Antaranya, “Masih ramai dalam kalangan pendakwah lebih-lebih lagi pendakwah selebriti masih tidak mengenal wahabi dan virusnya pada masyarakat.” Ada juga yang bertanya, “Jika ada yang memilih untuk tidak beraqidah asya'irah salahkah Ustaz? Jika ada yang ingin beraqidah seperti aqidah imam-imam 4 mazhab yang diyakini akidah salaf, tidak bolehkah?” dan daripada Tok Pakir, “ASWAJA makin belajar agama makin merasa jahil.” Ini antara yang ditujukan kepada Ustaz Zamihan. Daripada Azlinah Zaini, “Salam tuan-tuan panel, khususnya Dr Zamihan al-Ghari, mengapa susah untuk masukkan pendetailan asya'irah dan maturidiyyah dalam Undang-Undang Tubuh, bab aqidah. Apa masalah sebenar dan siapakah yang menghalangnya, prosedur atau manusia tertentu? Sebab dah lama isu ini dibangkitkan. Terima kasih.” Menjurus kepada soalan yang seterusnya, kita tanyakan kepada Ustaz Zamihan.

*Soalan: Apa lagi medium yang kita ada untuk menyedarkan golongan dewasa ini tentang ancaman kerosakan aqidah selain daripada media sosial? Apa lagi cara yang belum kumpulan Ahli Sunnah Wal Jamaah explore untuk memastikan masyarakat sedar tentang kebenaran yang harus diikuti. Silakan Ustaz.*

**Ustaz Dr Zamihan Mat Zin (ahli panel) = (1:00:05 – 1:18:44)**

Terima kasih tuan moderator, sahabat-sahabat ahli panel, dan semua para penyokong Ahli Sunnah Wal Jamaah asya'irah maturidiyyah. Apa lagi yang perlu kita lakukan untuk memperkasakan Ahli Sunnah Wal Jamaah sekaligus kita ada kekuatan untuk membanteras semua penyelewengan agama. Yang pertama sekali, agensi agama sama ada di peringkat persekutuan, JAKIM atau di peringkat negeri, Majlis Agama, Jabatan Mufti atau Jabatan Agama perlu mempunyai bajet yang besar untuk menjaga kesucian aqidah umat Islam. Jika tiada wang, maka kerja-kerja sukar dilakukan. Berapa ringgit yang kita peruntukkan untuk menjaga aqidah Ahli Sunnah Wal Jamaah. Jika mengharapkan NGO, atau individu sahaja untuk membuat kenyataan akhbar atau kenyataan media sosial, maka lambat memberi kesan. Jadi, jika kita betul-betul hendak menjaga aqidah, kita sediakan satu dana untuk menjaga kesucian aqidah Ahli Sunnah Wal Jamaah. Seperti yang disebutkan oleh Ustaz Abdullaah Jalil, untuk menjaga kesucian ini, kita jaga dari sudut undang-undang, bengkel, capai kata sepakat dengan agensi-agensi yang ada, perbetulkan dasar perundangan kita di peringkat federal dalam Perlembagaan Persekutuan, di peringkat pentadbiran agama Islam negeri, atau Undang-Undang Tubuh Negeri. Apabila dasar undang-undang itu ada, laksanakanlah. Undang-Undang Tubuh Negeri jelas Cuma tidak difahami, dihayati dan dikuatkuaskan oleh jawatankuasa agama. Ini jelas merupakan satu pengkhianatan terhadap kesucian aqidah Ahli Sunnah Wal Jamaah. Selain daripada bajet itu, kita boleh mencetak buku-buku, membuat seminar, membuat forum, bengkel dan modul. Jika kita tiada duit dan buat modul, jadi, Ustaz-Ustaz yang pulang daripada timur tengah seperti Jordan dan sebagainya yang kuat pegangan Wahabi ini akan membuka kitab dan fahaman mereka, sijil PHD yang mereka ada, lalu mengajar fahaman Wahabi di masjid. Ini yang menyebabkan masyarakat pening kepala. Jika masjid dikuasai oleh AJK wahabi, dia akan membawa penceramah-penceramah wahabi. Begitu juga dengan liberal, syiah dan sebagainya. Jadi, begitulah keadaan realiti yang berlaku dalam masyarakat kita. Jadi, jika agensi agama sedar akan

kepentingan Ahli Sunnah Wal Jamaah, mereka akan membuat bengkel dan bina modul. Maknanya, mana-mana Ustaz yang pulang daripada timur tengah hendak mengajar agama, itulah guna modul tersebut. Jelas bahawa kitab kita Ahli Sunnah Wal Jamaah, mazhab kita mazhab Shafie, sufi kita tasawuf yang benar, maka selesai masalah. Sama ada pengajaran itu di peringkat rendah, peringkat menengah atau tinggi, inilah bukunya, inilah sukatannya. Jelas. Jadi, fahaman kita seragam daripada kampung, daerah, negeri, hingga ke persekutuan. Fahaman pemimpin-pemimpin kita pun akan seragam daripada ADUN, Exco, ahli parlimen, hingga ketua menteri, Tuanku Sultan atau Raja, semuanya selaras dan seragam menurut acuan yang sama iaitu Ahli Sunnah Wal Jamaah. Tetapi jika tiada duit dan idea, kerja tidak boleh dilakukan. Seterusnya, bagi membendung ajaran sesat atau menyeleweng ini, fatwa mesti tuntas. Terdapat lapan fatwa negeri yang menyatakan tentang Wahabi adalah menyeleweng. Mana negeri-negeri lain? Tuanku sebagai ketua agama tetapi mufti tidak menfatwakannya lagi hatta fatwa tentang liberal yang tiada tindakan. Para penguatkuasa teragak-agak untuk menangkap penyebar ajaran sesat. Jadi, jika fatwa tidak dikuatkuasakan, bagaimana agensi penguatkuasaan hendak mengambil tindakan kepada penyelewengan agama? Yang ketiga, untuk kita memantapkan aqidah Ahli Sunnah Wal Jamaah dan membendung penularan ajaran sesat ini, kita perlu mempunyai war room. Sebagaimana kita hendak mencari kelemahan rakan politik kita, segala tingkah lakunya, kita mesti mempunyai data itu. Data tersebut boleh dikumpul melalui war room. Jadi, jika agensi agama tiada war room untuk mencari data berkaitan ajaran sesat, kita belajarlah dengan agensi keselamatan. Sebagaimana kita belajar war room polis, bagaimana polis hendak menjelaki seorang penjenayah, kita belajar daripada militari atau askar, bagaimana mereka menjaga keselamatan siber atau sempadan negara daripada dicerobohi musuh atau lorong-lorong tikus yang dijadikan tempat penyusupan barang atau pemerdagangan manusia dan pemalsuan dokumen. Jadi, agensi agama ini perlu mempunyai rasa sudi untuk mempelajari cara untuk *set up* war room yang membolehkan kita mengumpul data berkaitan dengan ajaran sesat seperti wahabi, syiah, liberal dan lain-lain ajaran ekstremis. Apabila kita telah mendapat data, mudah untuk kita mengambil tindakan. Jangan hanya menunggu pendedahan melalui media sosial dan wartawan sahaja, baru kita hendak mengumpul data. Kita akan terlambat dalam mengumpul data. Tetapi jika ada war room, kita dapat menjakinya dari awal lagi. Jika agensi agama terdapat

kekurangan daripada segi siasatan, kita ambil polis menjadi pekerja di agensi agama khusus untuk membantu agensi agama dalam bidang siasatan kerana polis mempunyai kepakaran, latihan, pengalaman dan peralatan sendiri untuk menjelaki individu-individu atau subjek yang dikenalpasti membawa ajaran sesat menyeleweng atau membawa unsur ekstremis. Jadi, segala penyelewengan yang berlaku telah terdapat dalam radar dan telah melengkapkan kertas siasatan dan dakwaan sebelum kes itu meletup. Barulah masyarakat akan berpuas hati kerana agensi agama ini melakukan apa yang masyarakat mahukan. Terdapat 4 perkara tersebut yang perlu kita perkasakan mengikut sabda Nabi Muhammad SAW, sepanjang masa yang akan datang ini akan ada ulama' yang alim dan berpegang teguh dengan disiplin ilmu Ahli Sunnah Wal Jamaah, tugas mereka membendung golongan pelampau agama dan golongan penyeleweng agama dan golongan yang suka memesongkan dasar atau ajaran agama Islam. Ini merupakan tugas para alim ulama'. Jadi, jika alim ulama' tidak dilantik sebagai penyelidik dan pemikir, jadi kita tidak ada idea. Agensi agama memerlukan panel penyelidik atau pemikir atau jawatankuasa pemandu aqidah untuk mengenal pasti cara memperkasa aqidah Ahli Sunnah Wal Jamaah dan membanteras penyeleweng agama. Di samping itu, mesti ada jawatankuasa dalam perlbagai peringkat. Jadi, kita perlu mencari petunjuk daripada Allah SWT agar Allah memberikan kekuatan kepada kita. Yang paling besar sekali ialah peranan Ketua Agama Islam dan Adat-istiadat Negeri. Saya hendak ingatkan bahawa setiap kali hari Jumaat, khatib atau khutbah mendoakan Tuanku Sultan atau raja-raja dan Yang di-Pertua Negeri supaya menjaga agama. Perkara yang paling utama ialah menjaga kesucian aqidah Ahli Sunnah Wal Jamaah. Jika tidak menjaganya, kita mencari penyakit dengan Allah. Tiada harta yang berguna di akhirat kecuali seseorang yang datang kepada Allah dengan jiwa yang sejahtera iaitu bebas daripada nifa' dan syirik. Jika kita menjadi Wahabi, syiah dan sebagainya yang mengkafirkan orang, maka jiwa kita tidak sejahtera. Kita lihat semula, betulkah kata-kata, perbuatan dan akhlak kita. Jangan asyik menyalahkan tok guru kita, ibu bapa, adik beradik, masyarakat dan sebagainya, betulkah cara kita? Tidak betul dan tidak selari dengan ihdina as-siratul mustaqim. Yang berkuasa sebagai ketua laksanakan tanggungjawab sebagai ketua. Begitu juga dengan agensi agama. Sebagai ketua agensi agama, kita tahu siapa yang boleh kita abwa ke hadapan untuk memperkasakan Ahli Sunnah Wal Jamaah ini. Jika pensyarah universiti, mereka mengajar hanya mengikut silibus,

begitu juga dengan guru sekolah. Menteri Pelajaran perlu mengambil perhatian, jika mereka mengajar aqidah yang tidak betul dalam sukanan pelajaran, mereka perlu bertanggungjawab dengan Allah. Jika agensi agama tidak menyediakan modul atau buku untuk memperkasakan aqidah Ahli Sunnah Wal Jamaah, dalam masa yang sama, kita menyediakan anak-anak ini dengan aqidah yang menyeleweng. Perkara ini sangat bahaya. Jadi, setiap orang perlu memainkan peranan masing-masing. Kita ini hanya mengharapkan NGO sahaja. NGO juga menerima dana daripada kerajaan. Jika kerajaan atau Majlis Agama tidak memberikan sumbangan kepada NGO, bagaimana mereka hendak bergerak? Jika wahabi mendapat duit daripada Saudi, jika syiah mendapat duit daripada Iran, jika liberal mendapat duit daripada Amerika atau Eropah, kita dapat duit daripada mana? Jujur saya katakan, berapa banyak duit yang diperuntukkan oleh JAKIM untuk menjaga aqidah Ahli Sunnah Wal Jamaah asya'irah dan maturidiyyah? Berapa banyak wang yang agensi-agensi agama peruntukkan untuk menjaganya dan memperteguhkan mazhab Shafie? Jadi, kita tidak fokus kepada tanggungjawab kita yang sebenarnya. Masa masih belum terlambat. Ini pada peringkat pemahaman sahaja. Jika kita hendak lebih fokus, kita beri kepada jawatankuasa pemandu dan kita atur satu strategi yang tuntas supaya fokus kita tercapai. Itu sahaja.

**Lokman Hakiem Abd Samad (moderator) = (1:18:45 – 1:19:28)**

Terima kasih diucapkan kepada Ustaz Dr Zamihan, sungguh padu ulasan yang diberikan yang kita takkan dapat di kaca televisyen atau saluran rasmi. Pendedahan yang betul-betul eksklusif hanya terdapat di sini. Kita hendak tanyakan pula kepada Ustaz Dr Abdullaah.

*Soalan: Hasil daripada apa yang kita bicarakan ini, adakah setiap tenaga pengajar di universiti atau institut pelajaran perlu mendapatkan pentauliahan daripada agensi agama Islam seperintama pendakwah yang perlu mempunyai surat pentauliahan sebelum mengajar atau memberi ceramah di sesbuah negeri. Silakan.*

**Ustaz Dr Abdullaah Jalil (ahli panel) = (1:19:34 – 1:30:06)**

Baik, Alhamdulillah. Terima kasih Encik Lokman dan sahabat-sahabat panel yang dihormati. Jadi, soalannya, adakah pengajar di universiti juga perlu diawasi atau dipantau dan diperhatikan? Bagi saya, memang sangat-sangat perlu. Sebelum saya pergi kepada undang-undang, saya pergi

daripada perspektif seorang ibu bapa atau agama terlebih dahulu. Mana-mana pensyarah agama yang mengajar agama menyeleweng daripada Ahli Sunnah Wal Jamaah sebenarnya pengkhianat dalam agama tidak kira atas alasan apa sekalipun. Jika dia tidak membawa manhaj Ahli Sunnah Wal Jamaah dalam mendidik agama, itu sebenarnya penyelewengan. Ulama' juga telah menyebut bahawa ilmu ini adalah agama. Lihatlah daripada siapa yang kamu ambil. Tuan-tuan yang dimuliakan Allah SWT, kita ini jika hendak memilih guru dalam beragama sebenarnya dengan pilihan yang sangat ketat kerana ia akan memberi kesan kepada amalan, akhlak bahkan yang lebib besar, memberi kesan kepada akhirat kita nanti. Jadi, bayangkan sekiranya pensyarah di universiti mengajar aqidah yang menyeleweng daripada Ahli Sunnah Wal Jamaah, apa perasaan ibu bapa? Ibu bapa menghantar anak di universiti dengan harapan akan menjadi pembimbing atau ulama' tetapi apa yang diajarkan oleh pensyarah tidak menepati silibus atau manhaj Ahli Sunnah Wal Jamaah, bukan sahaja pensyarah itu telah mengkhianati tanggungjawabnya sebagai tenaga pengajar agama, malah dia sendiri telah mengkhianati ibu bapa yang datang menyerahkan anak mereka untuk dididik di universiti. Anak-anak malah menyesatkan, mengkafirkhan bahkan ibu bapa yang meninggal dunia itu tidak mahu ditalqinkan, tidak mahu ditahlilkan dan sebagainya. Sebab itulah pihak universiti perlu memilih guru atau pensyarah yang betul-betul mengikut manhaj Ahli Sunnah Wal Jamaah khususnya dalam pengajian agama untuk mendidik anak-anak yang diamanahkan oleh ibu bapa. Itu daripada perspektif agama dan harapan ibu bapa. Dari perspektif undang-undang pula, kita ini berbangsa Melayu, beragama Islam bermanhaj Ahli Sunnah Wal Jamaah, aqidah fiqh dan tasawuf. Jadi, sepatutnya universitilah yang menjadi kilang untuk melahirkan pelajar-pelajar agama yang jelas manhajnya dalam agama mengikut acuan Ahli Sunnah Wal Jamaah. Jadi, bagaimana kita hendak melahirkan masyarakat yang mendidik masyarakat di surau, masjid, sekolah, seminar-seminar, penulisan, penerbitan dan sebagainya jika tidak membawa aqidah Ahli Sunnah Wal Jamaah. Kadangkala kita terkejut mendengar pensyarah-pensyarah yang mengajar bahawa Allah itu duduk di Arasy. Berapa ramai pelajar yang telah terseleweng dan kita tidak tahu bilakah lagi terdapat kesempatan untuk mengubah kembali aqidahnya. Jika itu yang dipelajari di universiti, maka dia akan mengajarkan perkara yang sama kepada masyarakat. Jadi, ia akan melahirkan masyarakat yang bertentangan dengan aspirasi Ahli Sunnah Wal Jamaah yang memang menjadi

dukungan pentadbiran agama Islam di Malaysia ini. Kita ambil contoh negeri-negeri. Negeri mengeluarkan fatwa bahawa fahaman wahabi, syiah, liberal dan sebagainya sesat tetapi di universiti ada golongan yang mengajar untuk mencaci para sahabat, mengajar tafsiran agama dengan cara baru, yang membawa aqidah tasjim dan tasybih dan sebagainya. Jadi, perkara ini tidak selari apabila fatwa mengeluarkan sedemikian, manakala universiti mengajarkan yang bertentangan dengannya. Pada pandangan saya, dan perkara ini pernah dibangkitkan oleh seorang mufti yang saya kenal, beliau pernah bertanya kepada penasihat Undang-undang Negeri, adakah Majlis Islam Negeri berhak untuk campur tangan sekiranya pihak universiti menjemput atau mempunyai pensyarah yang mengajar aqidah yang bertentangan dengan fatwa negeri dan manhaj Ahli Sunnah Wal Jamaah. Penasihat Undang-undang tersebut menjawab, ada haknya kerana urusan agama ada di bawah kuasa negeri iaitu Tuanku Sultan dan memang ada peruntukan dalam Perlembagaan yang merujuk bahawa negeri boleh menghalang mana-mana ajaran yang hendak disebarluaskan dalam negeri tersebut. Jadi, dari segi undang-undang adalah *valid*. Ada hujahnya. Sebab itu, bagi saya pensyarah yang tidak mengajar pelajar dengan manhaj Ahli Sunnah Wal Jamaah adalah pengkhianat kepada ibu bapa, harapan pelajar untuk menjadi ‘ulama’ yang sebenar, negeri, sultan dan sebagainya bahkan pengalaman saya sendiri, terdapat tenaga pengajar yang sampai kepada tahap isteri kedua dan ketiganya merupakan isteri daripada kalangan pelajar yang telah dirosakkan pemikirannya. Terdapat juga satu kisah di mana seorang pengawal keselamatan pernah hubungi saya, ketika Ustaz tersebut sakit, pihak hospital swasta dan mengatakan bahawa terlalu ramai pelajar yang menjaganya ketika sakit di hospital. Sehingga begitu sekali didoktrin kepada para pelajar. Ahli bidaah ini merupakan ahli syubahat. Mereka tidak ada dalil, mereka hanya ada syubahat dalil. Orang awam dan para pelajar yang tidak mempunyai asas yang kukuh tidak mampu untuk berhadapan dengan ahli bidaah. Ahli bidaah ini seringkali dianggap sebagai ‘ulama’. Hakikatnya, mereka bukan ‘ulama’. Mereka adalah syubahat ‘ulama’. Jadi, yang boleh menangani ahli bidaah ini ialah para ‘ulama’. Orang awam lebih baik menghindari diri daripada mereka kerana mereka tidak mempunyai kemampuan untuk menolak syubahat-syubahat dalil. Mereka sangka bahawa itu adalah dalil tetapi sebenarnya bukan. Jadi, bagi saya, jelas bahawa tenaga pengajar perlu dipantau bahkan ada universiti yang membuat *profiling test* sebelum masuk mengajar untuk mencari pemikiran-pemikiran ekstrem, liberal,

syiah dan sebagainya. Tetapi biasalah, soal jawab ini boleh dimanipulasi oleh orang yang bertalqiyah. Orang yang bertalqiyah ini, di hadapan orang ramai dia cakap lain, di belakang orang cakap lain. Jadi, kita boleh kenal orang yang bertalqiyah dengan orang yang melaksanakan adab dalam perbezaan pandangan. Jangan tertipu. Jadi, kita takut orang-orang sebegini. Dalam kuliah mungkin tiada masalah, tetapi dalam pengajaran khusus, lain pula yang diajarnya. Jadi, perlu ada asas-asas undang-undang untuk memantaunya, InsyaAllah. Terima kasih.

**Lokman Hakiem Abd Samad (moderator) = (1:30:08 – 1:31:43)**

Baik, terima kasih diucapkan kepada Ustaz. Komen-komen daripada pembaca juga agak panas dan masuk bertalu-talu. Saya akan pilih tiga sahaja untuk dibacakan sebelum kita beralih ke bahagian kesimpulan. Yang pertama, daripada Mohamad Nazam, “Saya setuju supaya pemantauan pensyarah yang mengajar agama mesti mengikut manhaj ASWAJA sebagaimana sekarang terdapat pensyarah yang terang-terangan bercanggah dengan manhaj ASWAJA. Jika lambat bertindak, takut nasi sudah menjadi bubur. Golongan ini semakin ramai yang memegang jawatan penting dalam kerajaan. Mereka yang berautoriti mesti bertindak.” Seterusnya, saya hendak bacakan komen daripada Fisha. Katanya, “Orang politik kejar politik, sibuk dengan politik. Kita dah ada semua dari AJK surau sampailah ke jabatan mufti. Dari tadika sehingga ke universiti, pondok, NGO dan lain-lain. Tinggal sahaja ASWAJA bersinergi dalam semua ruang dan peluang.” Satu lagi komen, “Lebih bahaya apabila rangkaian televisyen pun membawa masuk pendakwah-pendakwah Wahabi, terang dan nyata.” Jadi, untuk kesimpulan, kita tinggal lagi beberapa minit, mungkin kita boleh ulaskan secara ringkas dan tuntas bermula dengan Ustaz Abd Rahman tentang topik pada malam ini yang bertajuk Kerosakan Aqidah dan Perpaduan Ummah: Apa puncanya? Silakan.

**Ustaz Abd Rahman Tajudin (ahli panel) = (1:31:46 – 1:33:59)**

Bismillahirrahmanirrahim. Secara kesimpulannya, ancaman aqidah ini kerana tidak wasatiyyah, tidak adil, dalam al-Quran disebutkan bahawa pertengahan antara terlebih dan terkurang. Jadi, munculnya fahaman-fahaman ini kerana tidak berada di tengah-tengah. Terlalu tekstual, menggunakan hadis sahaja, atau menggunakan aqliah. Maka, lahirlah golongan liberal, ekstrem

kerana tidak seimbang kerana Ahli Sunnah Wal Jamaah di Malaysia menggunakan dalil aqli dan naqli. Kedua-duanya digunakan. Dalil naqli menggunakan al-Quran dan hadis, manakala dalil aqli menggunakan kias dan ijmak ulama', akal dan hujah. Jadi, ini seimbang. Aliran Ahli Sunnah Wal Jamaah perlu seimbang. Jadi, golongan-golongan sesat terkeluar daripada Ahli Sunnah Wal Jamaah. Secara keseluruhannya, Malaysia perlu menjaga aqidah ini, undang-undang perlu dikukuhkan, pemantauan itu perlu dikuatkan dan perlu preventif kerana jika aqidah hancur, maka hancurlah negara ini. Berpegang teguhlah kepada ajaran Ahli Sunnah Wal Jamaah. Halanglah penceramah-penceramah Wahabi daripada keluar di kaca televisyen kerana boleh merosakkan umat. Halanglah pensyarah-pensyarah universiti yang melahirkan pelajar-pelajar yang ekstrem. Jadi, saya melihat peranan ulil amri dalam hal ini. Itu sahaja. Semoga perkongsian ini memberi manfaat kepada kita semua.

**Lokman Hakiem Abd Samad (moderator) = (1:33:59 – 1:34:04)**

Terima kasih Ustaz. Seterusnya, kita beralih kepada Ustaz Abdullaah sebagai kesimpulan. Silakan.

**Ustaz Dr Abdullaah Jalil (ahli panel) = (1:34:06 – 1:36:08)**

Baik, terima kasih. Sebagai penutup, saya mengajak kita semua untuk bermuhasabah diri khususnya para asatizah dan pihak-pihak berkuasa agama. Apakah tindakan yang perlu kita lakukan. Kita perlu ada tindakan dan kesatuan dan platform untuk memperkasakan kefahaman, ilmu Ahli Sunnah Wal Jamaah dalam masyarakat jika kita sendiri sayang kepada masyarakat. Jika tidak, mungkin kita akan lihat pada masa akan datang pertelingkahan akan semakin tajam. Terus-terang, berdasarkan kajian saya, kerana saya juga terlibat dengan kajian Preventing and Countering Violent Extremism dan sebagainya, antara sebab radikalism di Malaysia kurang zahir adalah kerana kecekapan polis dan undang-undang senjata yang ketat. Kerana itu kita tidak nampak pertumpahan darah seperti yang berlaku di negara-negara Arab tertentu kerana kita ada rangka undang-undang yang mengekang ekstremism sampai ke tahap persenjataan walaupun ada sedikit seperti ugutan-ugutan dan sebagainya. Jadi, masing-masing perlu lihat peranan masing-masing dan jangan sampai menyesal kerana tidak mengambil tindakan. Kesatuan ada pada aqidah yang betul, akhlak yang betul, syariat yang betul. InsyaAllah.

**Lokman Hakiem Abd Samad (moderator) = (1:36:11 – 1:36:17)**

Baik, terima kasih diucapkan kepada Ustaz Abdullaah dan kita beralih kepada Ustaz Zamihan sebagai penutup bagi topik pada malam ini. Silakan.

**Ustaz Dr Zamihan Mat Zin (ahli panel) = (1:36:24 – 1:50:28)**

Terima kasih tuan moderator, sahabat ahli panel yang dikasihi sekalian. Kesimpulan saya yang pertama ialah kita wajib memiliki jazam aqidah Ahli Sunnah Wal Jamaah. Aqidah kita aqidah muktamad. Kita menguasai topik-topik tentang Ilahiah, ketuhanan Allah, zat, sifat, perbuatan, nama-namanya dan kita boleh tolak syubhat yang berkaitan dengannya. Kita wajib jazam tentang nubuwwah terutamanya tentang kenabian baginda Nabi Muhammad SAW. Sifat wajib, harus, mustahil dan profil baginda sebagai seorang insan kamil, pemimpin yang agung, yang sentiasa prihatin, peka dan penyayang kepada kita dan terasa berat penderitaan yang kita alami di sisi Nabi SAW. Yang ketiga, jazam aqidah membantu kita untuk menguasai topik sam'iyyah. Topik yang kita dengar daripada wahyu dan lisan Nabi SAW. Walaupun gagal dibuktikan dengan pancaindera atau kajian makmal, tetapi kita dengar, yakin dan percaya bahawa perkara yang ghaib itu semua benar dari sisi Allah SWT dengan lisan baginda SAW. Di samping itu, kita juga perlu jazam aqidah dalam isu-isu yang berkait dengan aqidah dan pemikiran Islam. Kita mengetahui aqidah yang benar, dijadikan pegangan, anutan dan rantai keyakinan kita manakala fahaman yang menyeleweng hendaklah ditangani, diambil tindakan dan dipulihkan kembali kepada aqidah Ahli Sunnah Wal Jamaah. Dalam pengalaman saya bertahun-tahun, pernah berhadapan dengan Ustaz wahabi, Ustaz syiah, Ustaz liberal dan sebagainya. Alhamdulillah. Ini semua terhasil daripada jazam aqidah Ahli Sunnah Wal Jamaah. Dengan bidang kuasa yang ada pada kita, pengarah jabatan agama dan majlis agama yang di-pertua itu jagalah agama dan buatlah dasar agama yang teguh dan kukuh untuk memelihara Ahli Sunnah Wal Jamaah. Jabatan mufti tidak boleh takut untuk menfatwakan fahaman yang sesat. Jika mufti takut, tidak perlu jadi mufti. Jika kita jazam aqidah, tidak akan timbul soal takut untuk menfatwakan dan mengambil tindakan kepada golongan pelampau agama ini kerana ia merupakan satu jihad. Nabi Muhammad SAW bersabda, “Barang sesiapa yang menghidupkan sunnahku, di saat berlaku kerosakan di kalangan umatku, maka mereka yang berjuang itu dikurniakan ganjaran pahala 100

orang mati syahid. MasyaAllah. Menjaga agama adalah perkara yang paling utama daripada menjaga harta, kuasa, nama, dan sebagainya. Kemudian, ketua agama Islam bertindaklah sebagai ketua kerana disebutkan oleh ulama’, ‘Apabila kamu tidak melaksanakan amanah kamu dengan baik, maka kamu adalah pengkhianat.’ Yang membuat modul tentang pengajaran agama Islam terutamanya Kementerian Pelajaran Malaysia, buatlah modul aqidah Ahli Sunnah Wal Jamaah dan jangan mengambil penggubal modul dari kalangan ahli Wahabi. Itulah amanah kita untuk mendidik anak bangsa dengan aqidah yang benar. Begitu juga jika jabatan agama ingin memantapkan pengurusan dalam menangani ajaran sesat, agensi agama ini boleh berkolaborasi secara strategik dengan agensi keselamatan negara sama ada MKN, PDRM dan sebagainya. Keluarkan belanja untuk bina war room supaya kita dapat mengumpul data dengan pantas dan dapat mencari kelemahan mereka yang menyebarkan ajaran sesat ini dengan tuntas dan membolehkan tindakan diambil dengan tepat dan benar. Agensi agama juga perlu sedar bahawa pendakwah ajaran sesat ini bukan berlaku di dalam hutan, media sosial tetapi berlaku di IPTA dan IPTS. Jadi, tidak perlu takut untuk mengambil tindakan. Katakan di USIM ada pensyarah seperti Profesor, Dr, Naib Canselor yang membawa ajaran wahabi, panggil sahaja mereka dan minta mereka memberikan penjelasan. Mengapa mereka sebarkan wahabi? Mengapa bertentangan dengan fatwa? USIM terletak di Negeri Sembilan. Begitu juga dengan UPSI yang terletak di Perak. Perak itu negeri Ahli Sunnah Wal Jamaah dan telah difatwakan dalam pewartaan negeri tentang wahabi yang bertentang dengan Ahli Sunnah Wal Jamaah. Begitu juga dengan universiti-universiti Sabah, Johor, dan sebagainya. Tuanku Sultan Johor tegas dalam memelihara aqidah Ahli Sunnah Wal Jamaah. Apabila universiti wahabi hendak bertapak di Pagoh, maka Tuanku tidak mengizinkannya. Jadi, jika kita ada dasar perundangan, jazam aqidah, sediakan modul, cepat bertindak dan sebagainya, maka akan membantu memperkasa dan memelihara ekosistem Ahli Sunnah Wal Jamaah. Jadi, kelestarian Ahli Sunnah Wal Jamaah akan sentiasa kekal dan tidak perlu bergaduh sesama sendiri. Kita fokuskan idea untuk membentuk idea mampan untuk menjana pembangunan negara dan memperkasakan tamadun. Kita tidak perlu lagi berdebat dan berforum untuk perkara yang kecil. Seolah-olah tiada keharmonian dalam perbezaan pendapat. Itulah penangan takfiri ajaran wahabi. Kita orang Melayu telah berpegang kepada ajaran Ahli Sunnah Wal Jamaah sejak zaman Melayu Melaka. Jika aqidah tidak betul,

bagaimana kita hendak menghadapi Portugis pada 1511. Bagaimana hendak berperang menghadapi Belanda? Bagaimana hendak berperang sehingga mati melawan penjajah? Para syuhada' terdahulu sanggup mati kerana pegangan aqidah yang kuat. Jika kita percaya dengan firman Allah dalam surah al-Mulk tentang jasad orang yang syahid tidak dimakan oleh tanah, perkara itu memang berlaku dan ada di hadapan mata kita. Banyak kubur-kubur yang telah dialihkan. Jadi kita tidak perlu takut mati. Ini yang nabi ajarkan kepada kita. Berperanglah dengan musyrikin, munafik dan sesiapa sahaja, maka kita akan syahid. Jadi, jika aqidah tidak jazam, banyak perkara yang menakutkan kita tetapi jika aqidah kita jazam, banyak orang yang takut akan kita kerana Allah menjadikan suara kita digeruni oleh manusia. Semua orang perlu bekerja atas kemahiran masing-masing, maka akan dapat memperkasakan tamadun. Kesimpulannya, kita perlu jazamkan aqidah iaitu aqidah Ahli Sunnah Wal Jamaah asya;irah dan maturidiyyah dan bermazhab Shafie namun kita tetap meraikan mazhab lain dan menjadikan ulama' sufi sebagai pedoman dalam perjalanan menuju kepada Allah. InsyaAllah. Kita perlu berani untuk memperjuangkan jalan yang benar ini sebagaimana perjuangan para nabi dan Nabi Muhammad SAW, para sahabat, para tabiin, para auliya', para salihin, para syuhada' dan kita tergolong dalam golongan yang menelurusi perjalan dan perjuangan hidup mereka. InsyaAllah. Terima kasih kepada pengajur, sahabat ahli panel dan penonton yang memberikan komen

**Lokman Hakiem Abd Samad (moderator) = (1:50:34 – 1:52:48)**

Terima kasih diucapkan kepada Ustaz Zamihan. Disebabkan komen masuk bertalu-talu, saya hendak pilih lima sahaja sebelum kita mengakhiri perbincangan ini. Pertama sekali, "ASWAJA seperti ikan paus besar tetapi sedikit, wahabi dan liberal seperti ikan sardin yang banyak." Selain itu, "Pemerintah wajib tengok forum pada malam ini kerana sangat baik agar dapat menjaga aqidah umat Islam di Malaysia." Selain itu, "Ustaz-ustaz dan pendakwah hidupkan semula kuliah aqidah ASWAJA yang benar di semua masjid-masjid tanah air kita." Daripada Ali Mahmud, katanya "Kita perlu ketengahkan pendakwah ASWAJA dan mereka perlu berani ke hadapan. Dunia sudah semakin tenat." Dan yang terakhir, "Kita sama-sama angkat pendakwah ASWAJA. Kita ajak masyarakat untuk mengenal aqidah yang sebenar." InsyaAllah. Itulah antara komen. Bukan sekadar ulama', NGO, malah kita sendiri perlu berpegang teguh kepada perkara ini. Sebelum mengakhiri program, Perbincangan Rakyat Demi Melayu mengucapkan terima kasih

kepada Ustaz Abd Rahman Tajudin, Ustaz Dr Abdullaah Jalil dan Ustaz Dr Zamihan Mat Zin kerana sudi berkongsi pendapat dan bercakap tentang kerosakan aqidah dan perpaduan ummah yang perlu kita segera sedar. Dengan itu, Perbincangan Rakyat Demi Melayu mengundurkan diri, sama-sama kita bacakan surah al-Asr. InsyaAllah pada minggu hadapan, pada waktu yang sama, kita akan mengangkat lagi topik-topik yang panas, eksklusif yang tidak ada di kaca-kaca televisyen. InsyaAllah. Assalamualaikum w.b.t.